

栗香四筆

掃葉山房
石印

粟香四筆卷五

江陰 金武祥 泚生

粵東唐以前碑版罕存。即唐碑亦復寥寥。如南海神廟廟碑。夫子廟堂記。端州石室記。張曲江碑。湏陽果業寺開東嶺洞谷銘。其最著者也。然其中殊多湮沒者。按歐陽文忠公集古錄。王象之輿地紀勝。皆載有唐李蕃南巖亭記。在今英德縣境。攷之阮志。金石略。則稱已佚。僅列其目而已。近番禺汪懔吾孝廉兆鏞客遊英德。攷縣志。知在縣南二里。南山中。搜訪累年。一日忽於荒榛中得之。蓋此刻在南山之南石壁下。前臨大江。山徑險絕。人跡罕至。是以世無榻本。阮文達公督粵時。亦不得而見也。懔吾手搦數紙攜歸。以一紙贈予。按其文左行。楷書。凡十七行。行二十四字。其崩缺漫漶。不可辨認者。共二十餘字。他皆完好。詞義簡奧。書亦道秀。在虞褚之間。文中民作民。蓋避太宗諱。不署刻石人名年月。惟記云。元和七。已邑長侯君亭巖焉。故真陽志謂刻在元和七年。真陽志已佚此據廣東通志今榻本七字下剝蝕模糊。諦審點畫。類正字。非年字。然七正二字相連。不詞。殊難索解也。又考集古錄。謂此與周夔到難篇同刻。按到難篇首曰。天子握乾符之六年。阮文公達云。即元和六年。英德縣志載侯著為湏陽令。亦在元和時。是此二篇皆侯公所刻。足為集古錄之證。特一在六年。一在七年耳。

I 202.1
319
(3)



夫侯公風流文采餘事如此。知當日政績必更有可紀者。乃志乘不傳。僅賴此兩石刻以著其畧。可慨矣。按到難篇云上谷侯君名著字伯昭德門之荀也宰於涇陽蟹畧同惟百昭作伯昭同刻之到難篇宋姚鉉輯唐文粹既錄其文則宋時石刻尚在。今訪之碧落洞壁英德縣志云到難篇刻在縣南十五里碧落洞石壁上已泯滅不可復得。此記獨隱而復顯巍然無恙。殆其靈光固有不可掩抑者歟。記文各書皆未載。恭讀欽定全唐文亦無之。今特鈔錄於右。其字偏旁點畫悉依原本。俾攷古者有所依據。亦金石萃編之例也。

南巖亭記

隴西李蕃撰

湏之陽因以謚邑。邑以定四封之位。巖峙邑之南。故又謚之。抵望公門玄黃不迷。得曰復乎。為江之右。潞汾所經。得曰還乎。而綿歷代年寂漠。蕪沒衆元和七邑長侯君亭巖焉。故書君著其名。百昭其字。先三祀始至。鑒拔衆識。勝不能隱。具以民懷。嫗煦姑務富庶。故未亟經構。及是日三載。後百工休。君與佐曹唱和其事。且曰。以和序成。我懷澡靈繇。是析清白。俸成林壑。境與人共之。雖四十里古不為廣。矧不廣乎。以飽其德。恥後陳力。況用悅使。先程告成。彼觀舞之行。綴知德之薄。厚孰若觀衆之就。効明人之樂。康繇通蹟。遠理可徵矣。□□□化□□□宿煙是方。載陽周歲。

迭鮮春卉布茵夏木如□□□□□□驚浪涉不勞趾情捐多累四時流目一無
違□意□□融結凡千萬祀豈無他眺莫先我視天之所置信將有歸歸無其私惟
智自得不然何不隔耳目而一日俟我緬彼謝公東山右軍蘭亭向微二公亦為樵
數因人而大今古同途蕃也旅人目遊勝槩將無紀述如筆硯何至若政餘而成亭
亭成而飾喜是事之藩翰故不書斯亦非文為意也聊□□□□之不漏佳境云
吳延陵季子碑一在江陰縣暨陽鄉宋崇甯二年知常州軍朱彥重所摹一在丹陽
縣延陵鎮吳季子廟見金石文字記及訪碑錄乃唐大曆中潤州刺史蕭定所刻開
元中元宗命殷仲容所摹搨者相傳以為孔子書張燕公謝碑額表有云孔蒙吳札
之墳陶淵明季札贊亦云夫子戾止爰詔作銘然歐陽公以夫子未嘗至吳又諸字
特大非古簡牘所容為疑則此碑亦非真蹟矣

漢高帝大風歌石刻訪碑錄云無年月在沛縣徐州府志碑在沛縣歌風臺有二石
一豎於東不知年代西則元大德間摹刻者舊碑中斷東以鐵汪蛟門歌風臺記云
大德間邑令羅士學所摹李氏金石癖云相傳為漢曹喜書亦無可據曩見拓本其
篆法無籀斯矩矱決非西京真蹟洪氏平津讀碑記不載此目蓋亦以為贗物也
溧陽長潘乾校官碑漢光和四年十月造在今溧水縣學碑言惟泮宮之教又言構

修學宮。案漢書韓延壽傳。延壽於是令文學校官諸生。皮弁執俎豆。後漢書本紀。永平十年閏月甲午南巡。守幸南陽。召校官弟子作雅樂。奏鹿鳴。是校官為橫序之舍。非官名也。碑又云十月己丑朔。是年九月庚寅朔。閏九月小。故十月己丑朔。兩漢金石記謂是閏十月誤矣。碑中前半敘事之文曰。誄。兩漢金石記以為變例。潛研堂金石跋以為言失其義。授堂金石跋則謂誄之名。可施於生死。義固無嫌。案誄者哀死之名。毛傳稱喪紀能誄。周禮太祝作六辭。一曰誄。誄誄古通用。謂積累其行而述之。說文誄謚也。吏民頌功。不容稱誄。蓋潘乾去官既歿之後。追思舊德。銘之學校。故祝其本支百世。子孫熾昌。惟邵陽令曹景完碑。則為生前頌德之文。此不當與彼例也。古人立碑多在歿後。生死同稱之說。殆未可信。銘詞云。民人所彰。吳棫翁補引碑作瞻。蓋據陶內翰類文。本才老時。此石猶未出也。古音瞻彰相近。商頌殷武。以監叶遄。離騷天問。以嚴叶長。詩桑柔。民人所瞻。碑蓋引此改作彰者。以與陽合韻耳。段氏六書音均表。彰在八部。瞻在十部。古均並合。古音亦並通。又銘中蒸忠朋興存並與陽叶。

漢中殿殘字。在甘泉山惠照寺中。萃編云。相傳其地為廣陵厲王胥冢。俗稱琉璃王墳。琉璃即劉厲之謚。攷陳思王鼙鼓歌有云。中殿宜皇子。疑此石乃厲王舊宮殿石。

刻如五鳳磚。為魯孝王宮故物。未必定為墓中所出。

竇應孔子見老子像。在縣學宮中層。模糊已不可辨。上層孔子老子二像。有八分書孔子老子四字。下層凡三人並食。器有烹魚者。有脩鼎者。不知所繪何像也。汪容甫先生有手拓精本。朱宜祿跋尾。謂中層有人赤體跏坐。疑古豐侯象。蓋取垂戒之意。今此本為繆筱珊太史所藏。

吳禪國山碑。天璽元年。立在宜興縣張渚鎮北董山之巔。碑形圓而橢。似米國。故土人稱為國碑。碑言乙未年正月辛亥。得玉璽。文曰吳真皇帝。乃以次年丙申。改元天璽。改乙未為天冊元年。丙申改元天璽。以得玉璽之瑞也。吳志以得璽在天璽元年。誤矣。又志稱天璽元年。遣兼司徒董朝。兼太常周處。至陽羨縣封禪國山。建康實錄載此事。亦有處名。獨咸淳毘陵志。周必大泛舟錄。謂碑後周處名既不列。決為史誤。然檢此碑舊榻諦審。則第七行第十六字以下。太常處三字。尚隱然有點畫可尋。雲麓漫鈔釋文第七行。亦云遣丞相沈兼太常處奉迎。則不得因碑蝕疑史誤矣。周孝侯碑。亦稱處為吳太常卿。蓋孫皓因處陽羨人。故使攝禮官。從封禪。非處貢媚導諛。侈言符瑞。至立碑則處未預聞。故不列名也。咸淳志臆度之詞。殆未足據。又禪國山碑。為中書東觀令史立信。中郎將蘇建書。吳騫釋文引元劉大彬茅山志杜契。

為吳立信校尉。又九真太守碑。有立忠都尉。又吳志陸抗傳。亦烏中。遷立節中郎將。為證。今攷漢樊敏碑。有助義都尉。襄義都尉。吳之官制。蓋仍沿後漢而稍改之也。吳天發神識碑。天璽元年八月。立在江甯府學尊經閣。嘉慶十一年。燬於火。山謙之丹陽記云。此石晉宋時。已折為三段。故又稱三段碑。亦名天璽紀功碑。相傳為皇象書。然攷象在孫權時。居八絕之一。未必皓世猶存。昔人已辨之甚詳。其文傳為華覈所作。以覈嘗為東觀令。而碑後列名。復有蘭臺東觀令字也。此說見張勃吳錄。及許嵩建康實錄注。咸志因之。朱竹垞曝書亭跋。力辨其誣。據吳志華覈免官。在天璽元年。而此碑為天璽元年所立。則非覈作明矣。然攷國山碑。有國史瑩覈等名。亦天璽元年立。似未能曲為覈辨。又碑中會稽陳治。九江費宇。皆不見志傳。此碑始末。吳志亦不載。洪頤煊平津讀碑記云。其時言符瑞者。日至。史不勝書。理或然歟。吳衡陽太守葛祚碑。在句容縣西五里。吳志太平二年。以長沙西部為衡陽郡。搜神記。葛祚字元先。丹陽句容人。吳時為衡陽太守。郡境有大槎。橫水能為妖怪。祚將去官。乃大具斤斧之屬。將伐去之。云云。法苑珠林亦載其事。然攷兩晉石刻。尚用分隸。孫夫人太公望二碑。最為完善。此外則劉韜墓版。韓府君神道。雖寥寥數字。而晉代書法。已見一斑。獨葛祚碑額。改用正書。以九真太守谷朗碑例之。則此碑決非三國。

時真疏。洪頤煊因葛祚吳人。謂此即祚墓碑。今僅存其額。而不知為後人贋託。非篤論也。寶刻叢鈔引諸道石刻錄。有吳故衡陽郡太守葛府君之碑。蓋原石已久佚。梁建陵石闕在丹陽縣。蕭梁時為曲阿縣。東西二石柱。一正刻。一反刻。其反刻一石舊佚。今出其正刻。已碎為二。同治間。莫君友芝始鑄而合之。歐陽集古錄誤以此碑為宋文帝。案梁書武帝紀。皇考諱順之。天監元年。追尊為文皇帝。廟號太祖。天監七年。復建修二陵。周回五里內。居民改陵。監為令。此碑題云。太祖文皇帝之神道。則為蕭梁陵闕無疑。王象之輿地紀勝。已正其誤。今二石並存。可覆按也。梁代神道石闕。西柱正刻。東柱反書。用筆猶帶隸意。蓋去晉未遠。隸楷始分。諦觀此碑。益信劉宋前正書石刻。皆為贗物。自晉帖盛行。有導源程邈之說。通儒溺惑。鑒別未精。百喙一聲。豈能無慨。孫伯淵先生猶持此論。下此者更可知矣。法書要錄。梁庾元威百二十體書。有反左書一體。自敘云。反左書者。梁大同中。東宮學士孔敬通所創。案梁書武帝紀。大同十年三月甲午。輿駕幸蘭陵。謁建寧陵。辛丑。至修陵。癸卯。詔園陵職司。並錫位一階。此碑反左石刻。必孔敬通書。為大同十年所立。石井闕題字。在句容縣北。梁天監十五年。太歲丙申。詔茅山道士作亭。及井十五所。此其一也。洪頤煊讀碑記。稱梁武以造井亭作功德。亦佞佛之一證。按梁武佞佛在

普通大通間。此詔道士作井。猶未崇奉淨屠也。洪氏之論未免太苛。

梁始興忠武王蕭憺碑。在上元縣黃城村。劉孝綽撰文。貝義淵書。碑高一丈四尺餘。約三千餘字。上截剝泐過甚。平津館拓本較萃編多百餘字。惜今不傳。莫君友芝所拓本亦視萃編多數十字。洗刷泥鮮。字蹟益明。今增於昔。毋足怪也。梁書本傳云。義師起。以憺為冠軍將軍。西中郎。諮議參軍。遷相國。從事中郎。碑言風雲之會。即指其時。萃編以為指和帝即位時事。誤矣。本傳又云。和帝西下。憺為使持節都督六州諸軍事。平西將軍。荊州刺史。未拜。碑言為安西將軍。則天監元年所加號。與本傳稍有不合。其餘敘述多與傳同。萃編據南史本傳以碑為詳。豈未見姚思廉書歟。憺以普通三年十一月薨。則此碑之立當在普通四年。或云天監十八年立。非也。洪氏筠軒讀碑記云。銘辭式雕玄永。寄希仰諦。視玄下無殘泐痕。似書碑者脫一石字。安成康王蕭秀碑。在上元縣黃城村。天監十八年立。今碑文已全泐不可辨。其額云。梁故散騎常侍司空安成康王之碑。按梁書本傳。秀於天監十七年薨。贈侍中司空。其散騎常侍乃天監二年所加號。十一年即徵為侍中矣。此碑不書侍中。於金石例未合。殊不可解。

吳平忠侯蕭景石闕。在上元縣清風鄉。東西兩柱。一正刻。一反刻。今西柱已失。惟東

柱反刻猶存。文曰梁故侍中中撫將軍開府儀同三司吳平忠侯蕭公之神道。梁書本傳。景字子昭。高祖從父弟。封吳平縣侯。普通四年卒。贈侍中中撫軍開府儀同三司。謚曰忠。案梁官制有撫軍大將軍。見武帝天監七年紀有撫軍將軍。見武帝天監六年紀有中撫將軍。其實中撫將軍與撫軍將軍並非二官。或稱中撫軍者。史之省文。錢辛楣少詹謂傳脫將字。亦誤。紀稱天監六年置中衛中權將軍。而不言改置中撫。是中撫即撫軍矣。天監十二年建安王偉為撫軍將軍。十三年以中撫將軍建安王偉為左光祿大夫。是其證。

臨川靖惠王蕭宏石闕。在上元縣。兩柱皆係正刻。西柱右行。東柱左行。文曰梁故大尉侍中大將軍揚州牧假黃鉞臨川靖惠王之神道。梁書太祖五王傳。臨川王宏。字宣達。太祖第六子。安成王秀。字彥達。太祖第七子。南平王偉。字文達。太祖第八子。鄱陽王恢。字弘達。太祖第九子。始興王憺。字僧達。太祖第十一子。臨川王年最長。以普通七年四月薨。其石闕神道。用正刻。不用反左書。與建陵及蕭景碑異。平津館震字訪碑錄不載此碑。當時尚未出土也。

南康簡王蕭績神道。在上元縣。梁書本傳。績字世謹。高祖第四子。天監八年封南康郡王。大通三年薨。時年二十五。贈侍中中軍將軍。開府儀同三司。謚曰簡。與石刻文

合。又傳稱續寡玩好。少嗜欲。躬事儉約。所有租秩。悉寄天府。及薨。後府有南康國無名錢數千萬。蓋有高祖之風。亦賢王也。

建安敏侯蕭正立。神道在上元縣。文曰。梁故侍中建安敏侯之神道。案梁書臨川王宏傳。宏有七子。長正仁。次正義。次正德。正立其第五子。天監十年。正仁卒。詔以正立為世子。由宏意也。宏薨。正立表讓正義為嗣。高祖嘉而許之。改封正立為建安侯。邑千戶。則敏侯為正立無疑。又改蕭偉封建安郡王。後改封南平。謚元襄。又蕭理入封建安縣侯。為侯景所害。無謚號。皆與此碑不相涉。梁書正德有傳。而正立無傳。碑稱侍中敏侯。是卒後贈官賜謚。典禮甚優。以碑補史。此其一矣。

唐棲霞寺明徵君碑。在上元縣。上元三年四月立。高正臣

則高宗所御

製也。案徵君即南齊處士明僧紹。隱於攝山。其子仲暉捨宅為寺。高宗朝。其裔孫宗儼以方伎入閣供奉。高宗因製此碑賜之。舊唐書稱高宗親書。世以為榮。殆劉煦未見石本。故云然耳。高宗御書。乃江總棲霞山記。非明徵君碑。史誤顯然。唐李白瀨水貞義銘。在溧水縣。文載太白集中。此石本乃淳化五年十一月董衍重敘刻者。非唐時原碑也。

晉驃騎將軍城陽卞忠貞公墓碣。在江甯縣。宋王象之輿地紀勝碑記目云。南唐徐

錯書在建康府。然寶刻叢鈔所載徐錯書碑。獨無此目。恐非楚金真蹟。蓋宋葉氏所摹刻之本。

以上十九條。皆吳孟鼎茂才錄示。石刻均在江左。故鄉碑碣足資攷證。因備存之。保甲之法。昉於周禮。厥後歷朝行之。至王文成公而尤著。道光時。安肅徐致初太守棟輯保甲書四卷。詳言其功效。近見吾鄉張翰風先生與陸君論保甲書。乃謂利不勝害。先生曾任館陶知縣。通達吏治。所論體驗精切。備錄於此。以與實心為政者共商之。其書云。劾文足下。辱損書。以保甲為方今切務。當事有就詢者。輒為條其規則。並索琦昔日著錄。士君子雖不得位。苟一言出而方隅之民得受其福。誠仁人之心也。雖然。利害之際。所繫匪淺。用敢盡其區區。琦往時客新安。縉紳有欲行保甲者。屬琦兄弟詳定事宜。條理頗具。以為揀時之良法。莫此若也。既更十數年。就見聞所及。阮芸臺中丞之於浙。左仲甫太守之於合肥。而後知保甲之利。不勝其害。夫保甲之法。分縣為鄉。分鄉為里。分里為甲。分甲為牌。登其戶口。職業地畝之數。旬日而畢。至易也。十家為聯。有不善者。眾共檢察。至便也。然愚竊以為有難且不便者。何也。編審之始。縣官之耳目不能遍及。必有所任。非胥役地保則家人耳。此難在人。一也。冊籍之需。飲食之費。月日遞報舟車之資。自縣以上書吏之規例。撫藩委員查勘之供。

給不出之官。即出之民。出之民是多一科斂也。出之官則官不能勝。此難在費二也。鄉長里正。主一鄉一里之事。讀書謹厚之士不能為。莊農殷實之戶不敢為。其能且敢者。必强悍好事者也。强悍好事之人。使之主持鄉里。將滋擾累。一不便也。民固有親屬相往來。不肖者指以為面生可疑。藉端訛詐。事所必有。二不便也。鄉長里正有名在官。吏得制其短長。三不便也。十家有事。地保必牽連。甲長牌頭。平民無故而為官身。累且無已。四不便也。前之二難。勤能之官。或有補救之術。後之四不便。竊恐今之保甲。未之或免。故保甲之利未見。而害已較然明白矣。非徒四不便也。又有無益者三。窩藏賊盜之家。必有所恃。或勾結衙役。或拳勇無賴。一旦舉發之。勝與不勝。皆受其害。今欲使貧弱之民。不畏強禦。此不可必之數也。無益者一。匪徒立教設會。結黨成羣。恣睢鄉邑。官司莫敢詰問。誠恐激成事端。且根株難盡。故也。十家稽查。曾何足恃。無益者二。城坊市集。設巡環簿。過客詭託名姓。何從質驗。無益者三。幸而奉行。不過編查一通。戶懸門牌。酬應故事而已。其害猶小。若欲永為定法。朝稽夕考。孽孽以此為務。患將有不可言者。昔者王文成用之苗賊。交煽之時。項勤襄當鄖陽。劇賊破敗之後。招集新附。其民皆有戒心。故能自相保受。籍其丁壯。以為守禦之備。今於太平無事之時。強而行之。鮮不畏其煩費者。其時勢異也。故保甲者。用以團練。刑

可行。不用以團練則不可行。保甲者救亂之法。而非致治之本也。西安距前年匪徒滋事之後。又新有菩薩殿結會之案。較之他處。自有不同。若以保固鄉里為辭。曉譬紳士。使之悅奮。詳具條例。委之自辦。而不以胥役廁其間。勸課富室以率捐輸。貯之公所。主者掌之。編查冊報。一切之費。皆以此給。鄉長牌頭名達於官。而不為官役。官以時稽其勤惰。以為賞罰。如此則書吏無從需索。差為得矣。然非今日行保甲之意也。且亦不可以久。何也。一鄉之中。貧多富少。荒賑捐之義。倉捐之保甲。又捐之。其始也。顧其身家。恐遭寇暴。出其資財。共相保聚。迨其後閭井晏如。盜竊不作。各有懈心。用度不給。勢難接濟。其事將已。聽其遂已。則非行法之初心。欲其久遠。又無成全之善策。倘遇喜事。官吏刑驅勢迫。其厲民豈有極哉。民間為之。猶有此患。設其假手胥役。奚啻什百於此。方今水旱頻仍。民困已極。有司宜恤其饑寒。寬其差役。勸之耕桑。教之禮義。本至誠之心。行豈弟之政。足下視今之州縣。有實心為民者幾人哉。有其人。則不必保甲可也。無其人。而徒恃多設科條。負二難四不便。以行三無益。適以重困吾民。而為胥吏開其利孔也。鄙僊之見。惟足下開之。

陽湖張仲遠觀察曜孫。為翰風先生哲嗣。慷慨善論兵。與逸亭兄同官楚中。均為閩中丞。所騎蹕觀察有謹言慎好之居詩十八卷。惜分陰齋詩九卷。原本宛陵家法。而

篇什宏富。茲特錄數首以見一斑。老兵行云：德州河畔夜泊船。驚鳥叫月星闌干。白頭老卒傍船坐。然燈擊柝秋風寒。柝聲沈沈夜將午。閒話平生爭戰苦。自言少小即從軍。二十持戈列行伍。挽雕春野試長矛。逐虎秋郊射強弩。十丈晴虹意氣高。不數封侯曜簪組。烽烟八月衰草黃。羽書一夕來衡湘。束裝秣馬不遑息。沙塵滿眼征途長。拜別爺娘訣妻子。此去沙場惟效死。但期何日得蕩平。不計何年得歸里。刁斗連營畫角哀。礮車拔地聲如雷。同行赳赳十數輩。揮戈躍馬長雲摧。斯時壯氣不可剋。但覺男兒本無敵。深探虎穴氣汪洋。雙挽人頭血狼藉。流矢如星夾脰過。鉛丸飛雨當胸射。七載疆場一瞬間。白骨如山鬼燈碧。埽盡機槍奏凱歌。千營交賀歡聲多。將軍一疏論功績。大小還勞細推劾。元戎冠佩燦輝煌。偏裨頭銜換藍赤。沾得皇家雨露恩。紛紛士卒亦簪纓。只今眼蟒懸章輩。猶有同胞共澤人。風塵滾滾去鷗鷺。杜宇聲聲夜啼血。如雲意氣散空烟。獨抱頭顱卧明月。富貴功名貴及時。蕭蕭雙鬢已成絲。可憐老臂傷無力。空羨彎弓好健兒。先從兄遺劍歌。詞為周保緒文所贈先兄以付余云：先兄力學兼好武。奇氣欲懾南山虎。結交最善周孝侯。手授梨花槍法古。隨身一劍斫鐔鐵。云是前朝禁中物。微茫鋒鏑卷秋毫。瘦削魚腸飛鍊雪。我年總角頗跳盪。一見顛狂莫喜遏。兄言此子有雄心。解贈居然愛能割。二十年來匣底藏。摩挲手澤長嗚咽。

書生憔悴昇平日。綠沈苔卧蛇矛折。著書老盡百年心。拱木深埋九京骨。如予碌碌更無用。魂魄雖強支體劣。春杯對影絕可憐。奇士相逢不能說。登高四望愁雲多。湯湯江海揚其波。七星九洲一葦過。揮斥鯨鯢噬蛟鼉。手洗戰血傾天河。櫓槍騰光如太阿。參旗井越相戛摩。煌煌大角搖元戈。十萬頑鐵方橫磨。臣精消亡鬢欲皤。獨寐寤宿山之過。劍兮劍兮奈汝何。堪聲云。西風吹不住。遂夜急霜砧。照徹深宵月。空傳萬里心。不愁微力盡。無那苦寒侵。此日遼陽客。誰憐淚滿襟。瘦馬云。伶俜餘勁骨。躑躅尚河干。精力為誰盡。風霜知汝寒。露肥春草綠。天闊大隄寬。十駕猶非晚。休嗟行路難。讀趙北部集題後云。絃外得深致。曲高多苦心。烟霞鍊奇骨。巖壑媚清音。海客渺何往。孤雲不可尋。寥寥千載意。珍重伯牙琴。久不得孟緹妙信云。一月無書至。憂疑夢不成。漸衰多病後。久別未歸人。天闊春寒重。宵長客緒頻。關心風雨急。或恐阻征輪。春暮窺園有感云。疏黃濃綠滿池塘。繞遍迴闌覓晚香。幾日聞愁憐夜雨。萬花含淚餞斜陽。鶯殘蝶倦春何處。井沒臺空事漸荒。回首盡成今昔感。游絲不解繫春光。姚吏部雪夜走訪云。不辭深巷踏珠塵。銀海光中玉立身。如此寒宵能念我。獨饒清興更無人。萬家寂靜成酣夢。一片空明見性真。便欲邀君御風去。孤山千樹正芳春。刻孟緹姊澹鞠軒詩成。書卷首云。隔簾記聽讀書聲。往日堂堂惜不成。鬢影相看

俱老大詩篇差喜漸縱橫。升沈一世皆浮迹。得失千秋有定評。忍憶趨庭同問業。飄風寒月若為情。三載春明夢未忘。敝廬一卧負流光。文章知己推同氣。離合中年總斷腸。倚柱心情憐漆室。縫裳針線愧睢陽。他時東觀重編纂。願讀曹家女誡章。滯迹云。獵獵征帆日夜過。兼旬滯迹奈愁何。寒暄花信春城暮。去住情懷客路多。舟楫空言思利濟。江湖垂老厭風波。中宵倚枕渾難寐。拍岸濤聲和短歌。

仲遠風多疾。究心岐黃。有病況詩三十四首。有云陰陽貴和平。氣血相維持。一旦失其性。錯亂不可治。木鬱蠱蟄生。川壅隄防危。萬物各自戕。非緣外入災。厲風何飄揚。壯火何炎熹。當其未形日。皆為生氣滋。順之性命原。逆之盜賊資。方剛安足恃。鍼石恐已遲。敢告同病人。庶幾察其微。又云昔我游京師。鬻技公卿間。踵門數十輩。奔走日以繁。越人起死人。聲譽頗藉然。賤者最易療。貴人獨難痊。命重如嵩恒。矜持慮萬端。既無知人哲。斯事夙未嫻。方藥千百種。決擇茫無邊。朝秦暮以楚。方溫復投寒。求生乃促生。天地亦無權。俞跗不敢與。潔身聊自全。庸衆安足責。習俗吁可歎。發明醫理。均為見道之言。

謹言慎好居詩。有和無錫章芝楣孝廉簡葫蘆詩四律。附載原唱。均極賦物之工。兼多比興。爰備錄之。章原作云。一桁疏籬樹影清。手牽翠蔓占庭坵。編杆好借扶持力。